

Item in der rathstoben ist geredt worden, esz worde zu Qweddelenborg nicht eher gut, sie lissen denne dreyen ader viern dy koppe abbehawen.

Item alle burger, dy uff das slos gehn, sich underteniglichin keygen myner gnedigen frawen und zcu den iren halden, der ist yn irer unholde; esz torren vil fromer lute nicht ire zeinsze uff dy borg tragen, das sie sich vor irer ungnade besorgenn.

Item der nawe rath hat myner gnedigen frawen arme lute usz dem Westendorffe in der stat nicht wolt komer zcugestaten, wywol ire (gnade) iren amptmann darumbe zcu dem ratte schigkte: das verhindertte Kir- stianus Wilde, und müssen dach eyne fremden komer zcugestaten.

Item alle innungen in der stat Qweddelenborg geboren myner gnedigen frawen zcu bestetigen, des verswigen sie alles und drucken das also under sich und wollen dy myner gnedigen frawen und dem stift entwenden und dem bisschoffe von Halberstat zufugen. Dy schuster haben myner gnedigen frawen inwoner in Westendorffe, der all- lengest dy innunge gehalden hat, von en gestossen, und saget, wiltu also reden und der frawen von Qweddelenborg zculegen, so bistu bey uns nicht notze.

Item myne gnedige frawe hat den burgern eyne bruderschaft zu des heyligen lichnams messe zcu singen zcu gegeben irleubet, haben sie eyne innunge ane wissin myner gnedigen frawen gesaczt und vil- lichte durch den bischoff zcu Halberstat lassen bestetigen, des ire gnade vermeynt, der bischoff eyn sulchs unmogelich thun.

Item der rath had myner gnedigen frawen eyne wesze vor irer gnaden mol<sup>1</sup> mit unrechte abegetedinget, do sind sie nicht umbe beschuldiget.

Item dem ratte ist entpfolen mym hern von Halberstat keyne folge nach zulegung forthmeher zcu thun, des der rath in keynerley wysze lassen wil.

Item dem ratte ist entpfolen dy funffczig marg geldis, dy sie mey[nem hern] von Halberstat alle jar gegeben haben, forthmeher keyns zcu geben, des sie auch nicht laszen wollen.

Item dem ratte ist entpfolen den alden richter, der myner gnedigen frawen eygen man ist und sich mit den gerichtten und andern stucken keygen iren gnaden nicht geborlichen gehalden had, usz der stat czihen lassen adder sich mit iren gnaden zcu vertragen, des sie auch nicht zcugestaten wollen, also dy gemeyne rede ist.

Item myne gnedige frawe hat abegang an irem salczzeolle, wirt verhindert durch dy burger. Wenne eyn burger mit eyne fuder strö- gein taschfort<sup>2</sup> feret, so furet her in sin husz X XII ader XV stücke salcz, und lest sinen nackbarn umbeher, eyne eyn stuck, dem andern zcwey, dem dritten eyn halbes, daz vorhen nymehere gewest ist, sun- dern eyn stücke adder eyn halbes zcu gebruchene in syme husze hat her macht mittenemen und nicht meher, und hat das keyme andern

1) *Am Rande*: die groper mol. — 2) *So*, Stassfort?